

nochkommenn ewig vortrag habenn, ouch an santh Jorgen tag nicht mit den forigen inwonern der Nedirfehir ym harnnißche vmbegehenn, nach vff santh Jorgen bergk eynigerleyhe dinst thun, ouch den selbigen forigen ynwonern der Nedirfehr, wenne sie ire guter vorkouffen vorwechßelnn ader vff eynander fellenn, keynen leyneckkowff geben. Wurde aber sust ymand außwendig der stad der vffgeschriben guter einenn ader etzliche an sich wollen brengen ader mit hauße vnnnd mit rowche besitzenn, der sal sich mit pflicht dinsten eyden holdunge vnnnd allen andern dingen, als ein ander inwoner der Nedirfeher kegen der kirchen vnnnd deme obedienciarien halden. Wurde ouch deßgleichenn ein burger die guter selbiß mit rowche vnnnd hauße besitzenn, der sal sich ouch mit gelowbden dinsten vnnnd allen pflichten als eyn ander inwoner der Nedirfeher gegin der kirchen zcu Meissenn vnnnd dem obedienciarien halden. Vnnnd das alle vorgeschribenne stücke ꝛ. gebenn nach Cristi vnnßers herrnn geborth tawsent virhundert vnnnd dornoch im achezigisten iore am dinstage nach Martini ym capittel zcu Meissenn.

Nach dem Orig. im Rathsarchiv zu Meissen mit den Siegeln des Bischofs und des Capitels an Pergamentstreifen.

No. 143. 1483. 22. Apr.

*Kurfürst Ernst und Herzog Albrecht bestätigen die vom Bürgermeister und Rathe für das neue Jahr gewählten Rathspersonen.*

Von gots gnaden Ernnt chuerfürst ꝛ. vnd Albrecht gebrudere herzogen zu Sachssen, lanntgrauen in Duringen vnd marggrauen zw Missen.

Vnnsern burgern gemeynlich vnser stat Missen. Lieben getrawen. Als von burgermeister vnd radtmann diß vorgangen iars bei vch dise hernachgeschriben mit namen Nickel Steinpach zu einem burgermeister, Augstin Zcadel, Nickel Swertfeger, Heinrich Hymmelreich, Peter Mager, Mattes Rizsch, Burckart Große, Hans Seidenheffter, Thomas Pinicker, Andres Edling, Valtin Voit vnd Ambrosius Winschenk zu radtmann gekorn vnnnd wir die mit demutiger bete zu bestetigen ersucht sint, haben wir dieselbenn also zu burgermeister vnnnd radtmanne auf diß iar confirmirt vnnnd bestetigt, confirmiren vnd bestetigen die dor zu hirmit geinwertiglich in vnd mit crafft diß brifs, von vch allen vnd iglichem in sunderheit begernde vnnnd ernstlich gebietende, den gnanten burgermeister vnd radtmann diß iar gantz aus gehorsam vnnnd geuolig zusein vnnnd vch nach ine in allen zcimlichen vnnnd billichen sachen vns, vnser herschafft, vch vnnnd der stat selbst zu gut genzlich zurichten bei vermeidung vnser vngnade. Ist vnser ernnt meynung vnnnd kompt vns von vch allen vnd idem in sunderheyt zu gutem dancke. Geben zu Dreßden am dinstag nach Jubilate anno ꝛ. LXXXIII.

Nach dem Orig. auf Papier im Rathsarchiv zu Meissen mit dem auf der Rückseite aufgedruckten Siegel.